

Te Heheuraa Api

E ITE IÄ OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 faran. i te matahiti.

Nº 1

-- TENUARE 1956 --

MAT. 43

NA TE MAU HOA O TE HEHEURAA API:

IA ORA NA I TE MATAHITI API

Ua tae roa te tau no te hiopoaraa, e te taata hiopoa o tatou iho ia. Te mau mea i ravehia e tatou, tei muri ia tatou i teie nei, ua oti ia e aita e nehenehe ia tatou ia faaapî i te mea tahito mai te reira te hurn. Teie râ, e tia roa ia tatou atoa ia haapâpû i to tatou mau mana'o e faahuru ê, e faaapî i to tatou oraraa i teie matahiti i mua nei. E mai te mea e na reira tatou e haere tatou i mua i te paari mau ra, e e herehia tatou e te Atua, e e haamaitai Oia ia tatou. A tamata ia faariro i to tatou oraraa mai to te Mesia a faaea ai Oia i nia iho i te fenua nei.

Ua riro te oraraa parau-tia o te Fatu ei hoho'a mau na te mau taata atoa, e ua riro To'na Tia-faahou-raa ei tapao matamua no te mau nunaa taata e, e tia-faahou-mai ratou no roto mai i to ratou mau apoo. Te hinaaro nei tatou paatoa i te hau e te Oaoa Mure Ore. Area râ, aita'tu e ravea e noaa mai ai taua na mea ra, na roto ia i to tatou haapaaraa i te mau ture a to tatou Fatu.

Ia riro te hau, e te manuiaraa, e te oaoa i te taviniraa i te mau ohipa a to tatou Fatu, ei faufaa na tatou. O ta'u ia pure i te Atua. To outou taeae i te faaroo.

— Erita Christensen

“Te Taata Puai Ra O Samasona”

(Te mau Tavana 13-14)

I te mau mahana o Iosua, ūa haapao ihora to Iseraela i te Fatu e Ta'na atoa ra mau faaneraa, e ua haamaitai atoa maira te Fatu ia ratou ra. E i muri mai râ i to'na ra poheraa, na faarne ana'e atura to Iseraela i te mau haapii-raa a te Fatu ra. E no to ratou hoi iteraa'tu i te tahi mau nunaa taata i te haamoriraa i te mau idolo, e te faaea-noa-raa hoi i roto i te hara ra, ua tupu atoa'tura hoi to ratou hinaaro ia riro atu mai taua mau taata nei ra te hurn.

E na roto i te poheraa o Iosua, ua mono maira te tahi mau aratai api; e i roto ia ratou, oia hoi, taua mau aratai nei, e mea paruparu roa te tahi pae o ratou i te haapaoraa i te mau parau a te Fatu, e aita'tura hoi i nehenehe ia ratou ia tavini atu la'na ra, e aita atoa hoi ratou i faaitoito i vetahi e mau taata i te haapaoraa i te mau faaneraa.

Ei taua mau taime ra, ua itehia te mau tavana ei mau haavâ. Ua maitihia hoi ratou no te haapaoraa i to Iseraela no na matahiti e toru hanere e pae ahurn. Area ra, aita roa'tu te mau taata o Iseraela i raro a'e i ta ratou ra mau faatereraa. E no reira, na tama'i ana'e atura ia ratou iho, e rave rahi te taata tei pohe roa i taua tama'iraa ra.

Ua riro atoa hoi te mau Ekalesia hape ei umeraa i te vetahi o ratou ra ei mau taata haamori idolo. E no taua mau mea ra, ua riri roa ihora te Atua ia ratou, e ua faaere ihora Oia ia ratou, Ta'na ra mau haamaitairaa.

Ei rotopu i taua mau taata ra tei tama'i atu i to Iseraela ra, e mau Philiseti ia te tahi pae o ratou ra. Ua faaea teie mau taata i te hiti o te miti Mediterane. E mau taata puai roa hoi ratou. E mea pinepine roa atoa hoi ratou i te upootia i roto i te mau tama'iraa i to Iseraela.

Ei taua tau ra, te aito rahi o to Iseraela ra o Samasona ia. E na mua'e hoi i te fanauraa o taua tamaiti nei, ua

fâ maira te hoê melahi i to'na ra metua vahine ma te na ô mai e, "*E fanau oe i te hoê tamaiti, e e paari hoi oia, e e faaora hoi oia i to Iseraela no roto atu i te rima o te mau Philiseti ra.*" Ei taua mau mahana ra tei roto hoi to Iseraela i te tâtîraa a te mau Philiseti no na matahiti e maha ahuru.

E i to te melahi apauraa'tu i te metua vahine o Samasona, ua na ô atoa'tura oia ia'na e, "*Eiaha roa oe e faatia noa'tu ia tapuhia te rouru o ta oe na tamaiti, no te mea e riro oia i to'na ra paariraa ei taata puai roa, area râ, ia tapu noa hia'tu to'na ra rouru, e riro ia oia mai te taata rii nei te huru, e ore hoi to'na ra e puai faahou.*"

E i to Samasona hoi apiraa ra, mai te tahi hoi mau tamarii o Iseraela, ua faaino noa ona i te mau Philiseti. I te hoê mahana, ua haru oia e toru hanere uri ruto, e ua taamuamu ihora oia i te ruru vahie ama i to ratou ra mau aero, e tiali ana'e atura i tana mau uri ruto nei i roto i te mau faaapu a te mau Philiseti. E inaha, ua ama ana'e ihora te mau faaapu tô i te anahi. E na roto hoi i teie mau ohipa, ua riro te reira, ei enemi rahi no te mau Philiseti, inaha ua tono maira ratou i te mau faehau no te imiraa ia Samasona, e te tuuraa hoi ia'na i roto i te fare tapearaa. Area te mau taata o Iseraela ra, aita roa ia ratou e hinaaro i te haapeapea noa'tu i te mau Philiseti, a tuu atoa hia'tu hoi ratou i roto i te tâtîraa, e aita roa hoi ratou e hinaaro i te tama'i. Area ra, tei rotopu te mau Philiseti ia ratou ra. E ua ani ana'e atura to Iseraela ia ratou, "*No te aha hoi outou i haere mai ai, mai te parau mai e, e taamu ia Samasona.*"

Ei reira, ua mata'u roa ihora to Iseraela i te Philiseti. E no reira, ua feruri ihora ratou e mea maitai a'e ia horoa atu ratou ia Samasona i te rima o te mau Philiseti ra, ia ore hoi ratou ia taparahi-atoa-hia.

E no reira, e toru tanasini hoi mau taata o Iseraela tei haere i pihaiho ia Samasona, mai te parau atu ia'na e, ua haere mai matou no te taamnamuraa ia oe e no te horoaraa'tu hoi ia oe i roto i te rima o te mau Philiseti ia ore hoi

matou ia roohia i te ati, ia faaorahia ra matou. Ei reira, na horoa atura Samasona ia'na ia taamuamuhia i na taura api maitai e te paari hoi. Ei muri iho ua afaihia ihora oia e te mau Philiseti o tei pii noa ma te oaoa i to ratou iteraa e, na taamuamuhia o Samasona, e no reira atoa, ua mana'o ihora ratou e, e nehenehe atura ia ia ratou ia taparahi ia'na ia ore hoi o na ia haapeapea faahou ia ratou.

Area râ, i to ratou tapearaa'tu ia'na, ua tae maira te Varua o te Atua i nia iho ia'na, ei reira, ua puai roa ihora to'na ra tino, e ua tumotumotu ihora oia i te taura i taamuamuhia i nia iho ia'na ra e ua faahu'ahu'a roa ihora i te reira.

E i to'na hi'o-noa-raa na te hiti ia'na, ua ite ihora oia i te utu o te hoê aseni. Inaha, ua rave maira oia i te reira, e ua tairi ihora i te mau Philiseti, e ua pohe ia'na hoê tauasini Philiseti.

Ua riro ihora Samasona ei haavâ no Iseraela no ua matahiti e piti ahuru.

Tahakura a Hutihuti

“Ziona I Nia I Te Mou'a”

Te na ô maira Isaia e, “*Mai te reira atoa to Iehova faaitoitorea ia Ziona; e te mau vahi ano i o'na ra, na'na ia e haamahanahana: e Na'na e fauriro i To'na vahi medebara mai ia Edene. e To'na vahi papamaro ra mai te ô a Iehova: e itea te oaoa e te pou pou i roto ia'na; te haamaitai, e te re'o himene ra.*”

Te ini nei te hoê taata i taua fenua ra o Ziona, eita ra oia e haere na te mau vahi taatahia, e te ruperupe no te ao nei, e ini râ oia i te vahi ano, e vahi medebara, mai te au i ta te peropheta ra o Isaia i parau mai e, “*E rearea te medebara e te vahi papamaro ra no ratou; e oaoa hoi te fenua aihere e e ruperupe hoi mai te tiare ra; e ruperupe rah ia, e ou‘au‘a noa ma te oaoa e te himene...*” (Isaia 35:1-2). Aita te mau tamarii no Ziona e haapututubhia i te vahi taatahia, i te medebara ra, e i te vahi taata ore hia.

Te haamaramarama atoa maira o Davita i te huru no Ziona no te mau mahana hopea nei mai te na ô mai e, “*E ua haaputu mai ia ratou mai te mau fenua roa mai; mai te hitia o te râ, e mai te tooa o te ra, mai apatoerau mai, e mai apatoa. I ori noa na ratou na te medebara na te fenua ano aore i itea e ratou te oire ei parahiraa.*” (Salamo 107:3-4)

Ua ori mau te mau tamarii o Iseraela na te medebara i te mau mahana no te peropheta ra o Mose. E ua iteahia ra to ratou fenua e, e fenua ruperupe ra ia, o Kauaana. E no reira ua papu roa ia tatou e, e ere mau no te mau tamarii o Iseraela taua parau tohu ra i faaitehia i nia nei.

Te na ô maira o Davita e, “*E faariro te Atua i te medebara ei pape hopuna; e te vahi repo maro ra ei pape pihaa; e ua haaparahi oia i tei pohe i te poia ra i reira, ia faanahonaho ratou i te tahi oire parahiraa.*” (Salamo 107:35-36). Te haapii mai nei teie irava ia tatou e, e repo maro tei taua vahi ano ra, e no reira, ua papu maitai atura ia tatou e, o te hoê ia fenua aore i faararirari pinepinehia e te ûa haumaru no te ra i mai, e o Daniela hoi te hoê peropheta tei ite orama i taua mau mea ra, a na ô mai ai oia e, “*Mai*

ta oe hoi i ite ra, e ooti noa-hia mai taua ofai ra no roto mai i te mou'a aore e rima ra..." (Daniela 2:45). "*E taua ofai ra no roto mai ia i te mou'a aore e rima, no reira, ua papu rea ia tatou e, i nia i te mou'a e itehia ai te Basileia i tohuhia nei, o te ore roa ia e mou, e ore hoi e riro ia vetahi era. e hope roa hoi taua mau basileia ra i te parari, e e pau e vai tera e amuri noa'tu*" (Daniela 2:44).

Ua ite atoa teie peropheta o Mika 4:1-2 e, "*Ei nia i te vahi teitei e faatiahia'i te fare o te Atua.*" Te 1 a reira atoa maira te parau i roto i te Isaia 4:9. E no reira, te faaite faahou maira o Isaia 62:12 e, "*E parauhia hoi ratou, o te Feia Mo'a ra, tei faaorahia e Iehova ra; e parauhia hoi oe, o tei here-roa-hia ra, te oire eita e iaaruehia ra*". E no reira, tei roto i te peho, o te mau Mou'a teitei e vai ai tana oire ra. "*E parahi hoi To'u ra mau taata i roto i te fare mau ma te peapea ore, e tia i roto i te parahiraa ora, e te vahi hauti-orehia mai. E mairi mai hoi te ua-paari i nia i te uru raau, e faafaitohia hoi te oire i te vahi papu.*" (Isaia 32:18-19). Na teie nei irava e haapii papu mai ia tatou e, e vahi teitei e te toetoe, e mairi mai te ua paari, ei te tau mahana, e tahe mai te pape paari, e te hiona, ia faararirari i te repo maro e te mau raau ra, "*E ia ninihia mai te varua no nia mai. ia tatou nei, e ia riro te medebara ei aua hotu maitai e te parau tia ra, e ia mana'ohia te aua hotu maitai ra ei uru raau. E parahi hoi te parau au i te medebara; e te parau tia ra, e parahi ia i roto i te aua hotu maitai ra.*" (Isaia 32:15-16).

I mua'tu i te matahiti 1830, na vai noa teie nei mau parau tohu aore i tupu, i muri maira, i te matahiti 1830, na tupu mau tei tohu-e'na-hia e te mau peropheta no taua oire

nei o tei parauhia, no te haaputuraa mai i te Feia Mo'a, mai na otia e maha o teie nei ao, i te vahi medebara e te ano, i te matahiti 1846 e te matahiti 1947. Ua ori te Feia Mo'a na te medebara mai te poia e te poiha e te toetoe, aita e oire, e parahiraa no ratou i reira, na tiavaruhia ratou i rapae i to ratou mau fenua nehenene i Navu Irinoi. Ua aratai ra te Fatu ia ratou i te hoê vahi ano e te medebara, i nia i te mau mou'a teitei ra i Utaha.

Ei reira, ua faatia te peropheta a te Fatu o Birikama Youne, e te mau Feia Mo'a no tei Teitei ra i té hoê oire, ei parahiraa no ratou ra, i nia i taua mou'a teitei ra, mai ta te Fatu i faaue mai ia ratou ra, e te tairuru mai nei te mau e Edene ra i reira, e te tere atu nei te mau ture mai Ziona atu i te mau taata atoa o teie nei ao ra, mai na hopea e maha atoa ra, e no reira, ua ruperupe roa taua oire iti ra, e na tupu mau hoi te mau parau i tohuhia no taua oire ra, e no te Basileia ta Daniela i tohu mai, o tei tupu hoi i te mau mahana hopea nei. Te vai ra anei te hoê Ekalesia o tei vai i roto i te mau mon'a ofai, ei te vahi medebara, e te ano i taua tan ra? Aita roa ia. E no reira, na papu roa na te Atua i aratai, e i faaora, e i faatia i taua Ekalesia nei.

Ia haapu ora'tu te Feia Mo'a i reira, no te mea, tei reira te vahi no te hau, te peapea ore, aore te ati pape, e aore te ati anahi i reira, e aore atoa hoi te aneueraa fenua i tupu i reira. Ua tupu ra te hau ana'e e te oaoa e te poupou e te reo haamaitai i reira.

Ua faaroohia te reo himene no roto mai i te medebara i teie mau mahana hopea nei.

Papaiahia Tauapiti Mariterangi.

“Te Bibilia E Te Buka A Moromona”

Te tiaturi nei te pae rahi o te mau taata e, o te Bibilia ra, o te parau mau ana'e ia a te Atua, e te Buka Moromona ra e ere ia, e aita roa'tu hoi ratou i farii e, e parau mau tana Buka nei. E no reira, e homa, a tai'o na outou i te Buka Moromona ia ite outou, e ua te Atua ia outou e haamaramama mai i te auraa mau e te parau mau o te Buka a Moromona, oia hoi, e tai'o outou i te Bibilia i te Mataio 5:1-48; Buka a Moromona III Nephi 12:1-48; Mataio 6:1-34; III Nephi 13:1-34; Mataio 7:1-29; III Nephi 14:1-27; E ia tai'o râ outou i teie mau parau i roto i teie na Buka, e na mua ia outou i te pure atu i te Atua ia haamaramama mai e ia haapapu mai ia outou i te auraa mau no tana mau parau nei, area râ, a tai'o ma te faaroo, e ma te tiaturi papu maitai, ei reira, e horoa mai ihoa ia te Atua i to outou mau hinaaro atoa, ei reira atoa hoi e roaa mai ai ia outou i te auraa mau no te Buka a Moromona, oia hoi, Te Parau Mau A Te Atua.

Teie te tahi niraa: E mea nahea to Iosepha Semita faatanoraa i te tai'oraa o te Bibilia e te Buka a Moromona? E mea nahea hoi to'na faatiaraa i te Ekalesia i tia'i mai ta Iesu i faatia i To'na ra anotau? Auanei paha outou e pahono ai e, ua tai'o oia i te Bibilia e a papai ai oia i te Buka a Moromona, e aore râ, a faatia'i oia i te Ekalesia. Area râ, te faaite atu nei au e, aita roa oia i na reira. Ua faaite maira te Atua ia'na i te ravea no te faatiaraa i te Ekalesia ia tano maitai i te hohoa o te Ekalesia i faatiahia e Iesu i To'na ra anotau. E ahiri ua na reira Iosepha Semita, e ite ihoa ia tatou i te hape, no te mea, ua faaite mai te Atua i te hohoa mau o ta Iesu Ekalesia, no reira aita tatou e hape, hoê â te mau parau o te Bibilia e te mau parau o te Buka a Moromona. Ua tae mau hoi o Iesu i Amerika i muri a'e i to'na tia-faahouraa mai mai te pohe mai i te taima oia i faarue ai i Ierusalem o tei papaihia i te Ohipa 1:9-11; ei To'na taeraa i te

ra'i. na ite mai Oia i te ati Nephi i te putuputuraa i te pae hiero i Ponetifura i Amerika, ei reira to'na haereraa nai i rotopu ia ratou, e aita â râ Oia i tae i To'na Metua ra mai tei faaitehia i te III Nephi 15:1. Ia oti Ta'na faatiaraa i te Ekalesia e te maitiraa hoi i Ta'na man aposetolo hoê ahuru ma piti e te tahi atu â man toroa i roto i te Ekalesia, e ite hoi te mau taata atoa mai Ta'na i na reira i Ierusalema. i reira hoi To'na revaraa i nia i te ra'i mai tei faaitehia i te III Nephi 18:38-39. No reira, te faaite faahou atu nei au e, ua haapaohia teie mau mea e te ati Nephi, e ua papaihia e ratou te mau haapiiraa ta Iesu i haapii ia ratou e te man ohipa atoa Ta'na i rave i rotopu ia ratou, e no reira, o te hohoa Ta'na i horoa i to Ierusalema o Ta'na ia i horoa i te ati Nephi i te fenua Amerika, e o te hohoa ia Ta'na i horoa mai i te Peropheta no te mau mahana hopea nei oia hoi ia Iosepha Semita te peropheta mau a te Atua. No reira e homa, ua tupu mau te parau a Amosa 3:7-8, no reira, eita roa'tu teie mau mea e oti i te paari o te taata nei maori ra, nâ roto râ i te mana e te horoaraa a te Atua.

No reira, e au mau hoa no te Heheuraa Apî, a tai'o na i te Buka a Moromona mai To'na haamataraa e tae noa'tu i te hopea, eiaha e fiu, area ra, te faaite haapapu atu nei au e ia tai'o outou i tana Buka e ia tae i te mau parau a Nephi, I Nephi 13:1-20, ei reira e tupu ihoa to outou hinaaro ia ite i to'na hopea ei ia tae ta outou mau tai'oraa i te mau tama'i a te Ati Nephi e te Ati Ramana, e tupu ihoa to outou hinaaro ia ite i to'na hopea, hoê â ia e te parau a te ati Iareda, e hoê atoa â te mau parau i roto i tana Buka ra.

Te faaite papu atu nei au e, e peropheta mau o Iosepha Semita na te Atua, e oia atoa te mau peropheta i mono mai ia'na, e tae roa mai hoi ia David O Mackay, te peropheta no teie mau mahana, no te mea e mea maiti-ana'e-hia ratou e te Atua iho.

O tera mai te mau mana'o e te mau parau haapapu no nia i te Evanelia a Iesu Mesia e na outou ia e farii mai i te reira.

Papaihia Teahu Mariteragi

TE MAU HAAPIIRAA NO TE AVAE MATI:

TE PARAIMERE;

Pupu 1 (i raro i te 4 o to ratou matahiti)

E faaterehia te mau hautiraa e au no ratou.

Pupu 2 (5-6 matahiti)

Hebedoma 1: Te maitai o te maa. Exodo 16:11-21

Hebedoma 2: Te Fare o te Atua, te Metua. Exodo 35, 36.

Hebedoma 3: Te hoê pic-nic rahi no te mau tamarii.

Hebedoma 4: Te aau maururu.

Hebedoma 5: (1. Te horoa-ê-raa'tu o to tatou iho mau haamaitairaa i to taata-tupu. 2. Te maitai i fariihia mai e te tahi mau taata na roto i te haaparareraahia'tu o to tatou iho mau haamaitairaa.

3. Te haaparareraa'tu i te maitai ta tatou iho e farii nei.

Pupu 3 (7-8 matahiti)

Hebedoma 1: Te Bapetizoraa.

Hebedoma 2: E te mau tamarii o te rave noa i te hoê mau ohipa, ua oaoa noa hoi ia ratou.

Hebedoma 3: E faaterehia te hoê pic-nic na te mau tamarii.

Hebedoma 4: Te Ture o te Tufaa Ahuru.

Hebedoma 5: Te tantururaa'tu te tahi e te tahi.

Pupu 4 (9-12 matahiti)

Hebedoma 1: Te Faaroo. (Irava Tamau aau no teie nei hebedoma, te Hiroa Faaroo 4)

Hebedoma 2: Te tatarahaparaa.

Hebedoma 3: E faaterehia te hoê pic-nicraa.

Hebedoma 4: Te haavâraa. Mataio 26:31-75, 27:1-26, Mareko 14:27-72, 15:1-15, Luka 22:39-71, Luka 23:1-25, Ioane 18.

Hebedoma 5: Ua oti ïa. Mataio 27:27-66 Mareko 15:15-47, Luka 23:24-56, Ioane 19:1-42.

IRAVA TAMAU AAU NA TE PARAIMERE

Inaha, to'u nei fare e fare nahonaho ïa, te na reira mai nei te Atua te Fatu ra. eiaha râ e fare no te ahcaho. (Buka Fafau 132:8)

HAAPIIRAA SABATI:

TE PARAU HAAMANA'ORAA ORO'A.

Ua parau Iesu, "*Ia maitai roa hoi outou mai to outou Metua i te ao e maitai roa ra.*"

Pupu 1 (i raro i te 9 o to ratou matahiti)

Hebedoma 1: Esetera, te arii vahine parau-tia
Esetera 1-7

Hebedoma 2: Ruka, te tamahine no Moaba. Te
Buka a Ruka

Hebedoma 3: Iareda e ta'na ra mau feia. Buka
Moromona Etera 1-6

Hebedoma 4: E Nunaa tei moe ê atura i te Atua.
Buka a Moromona Etera 7-15

Pupu 2 (10-15 matahiti)

Hebedoma 1: E Utuafare amahamahahia. Genese
27-28

Hebedoma 2: Te haamataraa o te opu o Iseraela.
Genese 29-33, 35

Hebedoma 3: O Iosepha i rotopu i ta'na ra mau
tuaana. Genese 37

Hebedoma 4: O Iosepha i roto i te fenua ê roa.
Genese 39-41

Pupu 3. E mau haapiiraa no roto mai i te buka - Ta Iesu i
Haapii. A haapii i te hoê pene i roto i te mau he-
bedoma o te avae.

Pupu 4 (17-25 matahiti) E mau haapiiraa no roto mai i te
Hiroa Faaroo.

Hebedoma 1: Haapiiraa 10.

Hebedoma 2: Haapiiraa 11.

Hebedoma 3: Haapiiraa 12.

Hebedoma 4: Haapiiraa 13.

Pupu 5 (Te feia Paari) E mau haapiiraa no roto mai i te Mau Ture Matamua no te Evanelia.

A taio na i te mau haapiiraa o te haponohia atu na outou.

TE MAU TUAHINE:

E haapiiraa no nia i te BUKA A MOROMONA. O outou paatoa, tei roto i te mau amaa taa-ê-roa i te amaa i Papeete nei, oia hoi, temau amaa atoa, maori râ Papeete nei, a haapii na i te hoê haapiiraa i te mau hebedoma atoa i roto i te mau avae. No te mahana tei faataahia ei iritiraa mana'o, a haapii na, e i muri iho, a haamata i te iritiraa o te mau mana'o. E na reira atoa hia ia i te mau mahana i faataahia no te raveraa i te mau ohipa. A pupu maite na i te mau parau faaiteraa o te haponohia'tu ia outou. Tei ia outou râ, te mahana tano no te iritiraa mana'o e te mahana tano hoi no te raveraa i te mau ohipa.

TE PARAU TUMU NO TE MAU TUAHINE HAHAEERE.

"Inaha hoi, tei teie nei oraraa te taime ia faaineine te taata ia farerei i te Atua; oia ia, o te mahana ia, te mahana o teie nei oraraa. ia rave te taata i ta ratou ohipa." (Alama 34:32)

TE FEIA API:

Pupu 1 (12-16 matahiti) Te haapiiraa "Scout".

Feia Api (17-25 matahiti) No te mau amaa atoa maori râ i Papeete nei, e haapii outou i teie i te mau haapiiraa no roto mai i te buka. "Te Parau Tuatapaparaa o Iosepha Semita, oia hoi, e amui mai i te feia api e te feia paari i te pupu hoê, ia haapii ratou i teie mau haapiiraa tumu mau. Tera râ, aita â i oti i te nenehia taua buka ra, no reira, e haapii outou i te mau haapiiraa no roto mai i te haapiiraa i faataahia na te Antahu'araa a Aarona. No te avae Tenuare e Febuare. Ia tae râ i te avae Mati ra, ei reira, outou e haapii ai i te "Parau Tuatapaparaa no Iosepha Semita". E haaponohia'tu teie mau buka, oia hoi, "te Parau Tuatapaparaa", ia outou, eiaha ia outou e peapea no te reira.

TE PARAU TAI'ONA TE FEIA API

"Aore hoi au i haama i te evanelia a te Mesia ra, no te mea o te mana ia o te Atua ia ora te faaroo ra; te Ati Iuda na e te Heleni atoa hoi". (Roma 1:16).

TE AUTAHU'ARAA:

Te mau haapiiraa na te Autahu'araa a Aaron a te Autahu'araa a Melehizedeka i te mau amaa'toa hoi i rapae au mai i te mau hiti o Papeete nei.

Hebedoma 1: Ma te rima ma e te aauporao ore. III Nephi 18:26-34

Hebedoma 2: Te machine tino tahuti nei.

Hebedoma 3: A faatura noa'tu i to te tahi mau faufaa. Exodo 20:15
Buka Fafau 42:20-29.

Hebedoma 4: Te Mana i te raveraahia. Buka Fafau 93:23, 29-35;
Buka Fafau 121:34-46; Amosa 3:7.

TE AUTAHU'ARAA:

(No te Autahu'araa a Melehizedeka no te amaa Papeete ana'e)

Hebedoma 1: E feia maitihia. Genese 12:1-3; Genese 17:2-4; Iosua 24:14-15.

Hebedoma 2: E feia maitihia - Ioane 5:37; Ioane 10:10; Genese 12:3,

Hebedoma 3: A faatura noa'tu i ta te tahi mau faufaa Exodo 20:15; B. F. 42:20, 26.

Hebedoma 4: Te mana i te rave-raa-hia - B. F. 93:22-29-35; 121:34-46; Amosa 3:7.

TE HAAPIIRAA NA TE MAU TAATA HAHAEERE:

Te Hiroa Faaroo numera toru: *"Te faaroo nei matou e, no te taraehara a te Mesia ra, e ora'i te taata atoa o tei haapao i te mau ture e te mau faaueraa o te Evanelia nei."*

PARAU RII API

"To Tatou Amuiraa"

"...ia faatiahia te hoê fare mai to'u nei i'oa, ei parahiraa no Tei Teitei ra; aore roa hoi e vahi i itehia i te ao nei e tia'i ia'na ia haere mai e ia faahoi faahou mai i tei moe ia outou, oia hoi, i tei afai-ê-hia e Ana, oia hoi, te iraa no te Autahu'araa; aore hoi e vahi e vai nei ei farii pape baptizoraa i te ao nei; ia baptizohia ratou To'u Feia Mo'a no te feia i pohe ra; tei reira hoi te mau taviri no te Autahu'araa mo'a, te faatumuraahia, ia noaa ia outou te tura e te hanahaha ... Buka Fafau 124:27-29, 31.

Aita outou i ite e, o te hiero outou o te Atua, e te parahi ra te Varua o te Atua i roto ia outou na. E ia haaviivii te hoê taata i te hiero o te Atua ra, e pohe oia i te Atua, e mo'a hoi to te hiero o te Atua, e taua hiero ra, o outou ia.

Ua riro hoi teie na irava nehenehe roa eiparau tumu mau no to tatou amuiraa tei faaterehia i Papeete nei i te mau mahana matamua no te avae Ditema. Ua rave rahi hoi te mau taata tei amui mai no taua amuiraa nei no te raveraa hoi i te mau ohipa i opuahia, e no reira, uâ tamaa maitai ratou i te hoê maa Evanelia. Ua haamaitai te Atua i to tatou amuiraa nei, e no reira hoi; aita roa'tu te hoê mau tafifiraa i tupu. E maa ua rii noa hoi tei topa mai, aita râ i rahi.

I na mahana na mua a'e i te amuiraa, ua faaterehia te hoê haapiiraa nehenehe roa, i roto i to tatou fare putuputuraa e Toma Orometua, oia hoi, te oraraa o Iesu Mesia, to tatou Faaora. Ua i roa te fare putuputuraa i taua na pô ra, e rave rahi hoi te mau taata no rapae au i te Ekalesia tei amui mai taua na pô ra, ia mataitai i taua haapiiraa faahiahia ra. Ua mauruuru roa ratou e tatou atoa no te nehenehe o te faatiaraa mai i te aamu no te oraraa o Iesu Mesia. Ua riro mau teie haapiiraa ei faufaa rahi na tatou, e ei faaetaetaraa i to tatou faaroo i nia i te tumu mau no to Iesu fanau-raa-hia mai, e tae noa'tu hoi i te ohipa Ta'na i rave.

I te poipoi monire, i te hora 9, i haamata'i ta tatou amuiraa na roto i te haereraa mai o te mau taata i te fare orometua ia papai i to ratou mau i'oa, ia nehenehe hoi ia tatou ia ite e, ehia taata tei tae mai no teie amuiraa e no hea mai hoi ratou. Teie hoi te mau fenua i tai'ohia i teie amuiraa: Takaroa, Hikueru, Takapoto, Tubuai, Raiatea, Tahaa, Huahine, Paea, (Tahiti) Papeete. Ua opua-atoa-hia, ia haamata i te hautiraa popo no te haruraa rê i taua pô ra, area râ, ua vaihohia ia e tae noa'tu i te mahana toru.

I te pô mahana piti, ua tupu faahou mai te "Soiree Musicale" i raro a'e i te faatereraa a Toma orometua. "Aue te nehenehe o to ratou mau reo e". Ua mauruuru roa hoi te mau taata tei amui mai no taua ohipa ra.

I te mahana toru i te hora 5, ua haamata te hautiraa popo i te fare putuputuraa. Aita hoi i rahi te mau pupu tei hanti, e 5, pupu tamaroa, e 2 pupu tamahine, e mea maitai roa ia. Ua riro te rê no te mau tamaroa i te pupu hoê no Papeete, e te aue na te mau tamahine tei te pupu hoê no Papeete. Ua riro hoi te aua no te taata hau i te hanti maitai ia Jean Bonnet, e no te tamahine, ia Erena Tekuravehe. E ua roaa atoa hoi ia Tahaa e Raiatea ma te aua no te pupu hau i te maitai i te mau vahi atoa. Ua operehia teie mau aua i te mau pupu, i te pô mahana maa, a tupu ai te oriraa.

I te poipoi mahana maha, ua faaterehia te hoê Pic-nic rahi no te mau tamarii no roto i te Paraimere, ua haere atu hoi ratou i Arue ia hopu i te miti e ia hanti i te tahi mau hautiraa i opuahia a'enei no ratou ra. Ua oaoa roa hoi te mau tamarii i te mea e, i faaamuhia ratou i te monamona, e te tahi atu â man huru maa e au i te amu. Ho'i maira ratou i te hora 3 i te ahiahi. I taua pô ihora, ua faatupuhia te hoê haapiiraa hohoa e te hoora ta'o'a tei haapaohia mai e te mau tuahine. Ei muri maira, ua hautihia maira te hoê cinema nehenehe roa. E mea manu'a roa hoi te mau ohipa o te reira pô.

I te mahana pae i te poipoi, ua faaterehia te hoê pureraa na te mau feia toroa atoa i teie paeau moana nei. Na te mau orometua popaa i haapao i te reira pureraa, e ua riro te reira ei faufaa, e ei tautu u rahi hoi na te mau feia faatere tei tae mai. Ua faatupuhia te tahi mau ravea api, te tahi hoi mau mana'o api, ia tauturu mai i te ohipa o te ravehia i te matahiti i mua nei.

E i te poipoi mahana maa, ua faaterehia te hoê pureraa i to tatou fare pureraa na roto i te reo Tahiti, e te tumu no te reira pureraa, oia hoi, no nia i te mau Hiero, e eaha te mau ohipa te tia ia ravehia ia tomo tatou i roto i te mau hiero ra. Ua a'o mai te tahi o to tatou ma i taeae e te tahi o to tatou mau orometua popaa no nia i te huru o te mau Hiero, e no te aha hoi i patuhia'i ratou e tia'i. Ua nehehehe roa taua pureraa ra e te mau taata hoi tei tairuru mai no te reira, ua oaoao ana'e ratou na roto i teie mau a'oraa e te mau himene navenave hoi. E i te avatea, i te hora piti, o taua mahana ra, ua faaterehia te hoê pureraa i te reo Farani. Na Toma orometua hoi i faatere i te reira, e rave rahi hoi te taata tei amui maira, ia faaroo i te Evanelia a te Fatu i roto i te reo Farani. E mea nehehehe hoi te mau a'oraa no nia i te mau Hiero, e te tahi mau tafaa no nia i te mau mea e tia ia haapaohia e tatou, ia tomo atu tatou i roto i te mau Hiero.

I taua pô ra, ua faaterehia te hoê oriraa rahi tei parauhia, "Te Oriraa Matie e te Piru". Aue te nehehehe o te mau faaunauararaa tei tuubia e ati noa'e te fare putuputuraa nei. Ua maitihia e ono Arii Vahine e ono atoa hoi Arii Tane no teie oriraa mai te au hoi i to ratou tutavararaa i te mau ohipa i roto i to ratou iho mau amaa, e ua riro teie toroa Arii Vahine e te toroa Arii Tane ei utua maitai na ratou o tei haapao e o tei rave tamau noa â i te ohipa maitai na roto atu i teie matahiti.

Na Re orometua, e Tahakura a Hutihuti, i himene mai i te hoê himene apî roa e te navenave no taua oriraa ra, no te faaturaraa'tu tatou i teie nei mau Arii. Aue hoi te au o taua himene ê! Ua popo noa te mau taata i taua himene ra. Teie to ratou mau i'oa: Marie a Tumarae e o Apiatara a Tehoriri no (Tubuai); Daniera Jordan e o Anita Ahsing no (Raiatea), Josephine Hapairai e o Terai Hapairai no (Tahaa), Agnes Theodor e o Albert Tahuhuterani no te

(Amaa Farani i Papeete nei). Maeva Buchin e o Opura Moo no te (Amaa Tahiti i Papeete nei), Doris Kamehameha e o Henri Buchin o te (Amaa Paea).

I te mahana Sabati, e toru pureraa tei faaterehia. Ua i roa te fare pureraa no teie mau pureraa i te taata. Ua nehenehe mau te mau a'oraa e te mau ohipa hoi i ravehia i roto i taua mau pureraa nei. Ua horoahia'tura te pure-raa no taua pô ra i te Feia Api, e na ratou hoi te reira i faa-tere. E ua hau roa atoa te reira i te maitai.

I te Mouire, ua haere te amuiraa atoa i Arue ia bopu i te miti, e ia faatia i te hoê tamaaraa rahi roa. Ua faaea noa te mau taata i Arue e tae noa'tu i te pô, ei reira, ua tutuihia a'era te hoê anahi, e ua faati ana'e atura te mau taata atoa i taua auahi ra, e inaha, ua himene e ua pure ana'e atura. Aue hoi te oaoa o te mau taata tei tae atu i taua mahana ra.

Ua mauruuru roa matou, te mau orometua, e te Pèresideni o teie nei Misioni nei, no to outou taeraa mai i Papeete nei no ta tatou Amuiraa. Ua mauruuru hoi matou paatoa no to outou tautururaa mai i te faariroraa i teie nei Amuiraa Rahi ei oaoaraa, e ei manūiaraa no te mau Feia Mo'a atoa tei tae mai.

Ia haamaitai atu tatou i to tatou Atua no te mau haamaitairaa Ta'na i horoa mai na tatou. Ia haamaitai-noa-hia outou e te Atua, o ta matou nei ia pure i te mau taima atoa. No reira, faaitoito outou i te ohipa a te Fatu, e tae roa'tu i te taima, e farerei faahou ai tatou i roto i te i'oa o te Mesia i to tatou Amuiraa Rahi i Papeete nei.